

quentius et continuo, juxta Art. 7. Decreti 2. Maximiliani Imperatoris, Anni 1572. et Art. 3. Anni 1575. in solito suo loco et Terminis consuetis celebrari; et per Dominum Comitem Banum, sine impedimento publicari possint:

§. 1. Praesertim cum non Incluta Camera suae Majestatis Ungarica, sed illud solum Regnum. Assessores illorum Judiciorum et Sedis Banalis, pro Diurnis ipsorum, ex propriis suis Contributionibus exolvere soleat.

§. 2. Hoc declarato; quod, si ante expletos ipsorum Judiciorum Ordinarios dies, in praescripto Article 7. Anni 1572. et in Article 13. An. 1478. declaratos, causae deficerent; per hoc Judicia hujusmodi non condescendant, suadente Article 3. Anni 1486.

Transmissiones in Regno quoque Sclavoniae et Croatiae, etiam extraordinarie, in plena tamen Sede Banali revideantur.

Articulus 88.

Pro celeriori Justitiae, in illis etiam Regnis administratione, necessarium judicarent Status et Ordines; ut in Regno quoque Sclavoniae et Croatiae Transmissiones Protonotarii et Comitatum illius Regni, non solum in ordinaria Sede Banali, sive Octavali illius Regni, sed etiam extraordinarie, in plena tamen Sede Banali; juxta Article 3. Anni 1575. computanda, singulis futuris Annis, in quibus Octavae illius Regni, in Sede Banali celebrari solitae fuerint, intermissae; in Termino ad id per Dominum Banum praefigendo, tot diebus, quot necessarium fuerit, legitime revideri; abinde vero, juxta Titulum 3. partis 3. Decreti Tripartiti, in Curiam Regiam provocari; et sub Posoniensibus duntaxat Generalibus, vel Brevibus Judiciis, ac sub Diaetalibus etiam Terminis Posonii celebrandis, juxta citatum Art. 7. Decreti Secundi Maximiliani, Anni 1572. vel vero juxta Art. 52. Anni 1622. in Termino Revisionis Appellationum, per Dominum Comitem Palatinum, in partibus Cisdanubianis praefigendo, iterum maturius revideri possint ac debeant.

§. 1. Ad Judicia vero in Civitate Eperjes celebranda, ob longam distantiam et pericula itinerum; juxta citatos Articulos, nemo ex Regno Sclavoniae suas Appellationes deducere teneatur.

§. 2. Appellationibus ex illo quoque Regno, jam non revisis, pro rejectis manentibus.

De Valachis, Sclavis et Praedaucis, in Confiniis commorantibus; renovatur Article 31. Anni 1649. et Generalis Commissio Viennae, intra Annum hinc computandum, instituat.

Articulus 89.

Ex benigna suae Majestatis annuentia et communi Regnicolarum voto, de restitutione Valachorum, in Confiniis Sclavonicis et Croaticis commorantium, eorundemque ad Sacram Regni Coronam et Regnum, juxta Diploma et Articulos